

摘藻堂四庫全書薈要

史部

欽定四庫全書薈要

史部

明史卷二百九十五

六



詳校官中書

臣

劉源溥

欽定四庫全書薈要卷六千八百八十八 吏部

明史卷二百九十五

大學士張廷玉等奉 敕修

傳第一百八十三

忠義七

何復 邵宗元等

張羅俊 弟羅彥等

金毓峒 韓東明等

湯文瓊 范咸聽等

許琰 曹肅等

王喬棟



張繼孟

陳其赤等

劉士斗

沈雲祚等

王勵精

劉三策等

尹伸

莊祖誥等

高其勲

王士傑等

張耀

吳子騏
曾異撰等

米壽圖

耿廷錄

馬乾

席上珍

孔師程等

徐道興

羅國璫等

劉廷標

王運開
王運閏

何復字見元平度人邵宗元字景康碭山人復崇禎七

年進士知高縣有却賊功忤上官被劾謫戍後廷臣多

論薦起英山知縣累遷工部主事進員外郎十七年二

月擢保定知府宗元由恩貢生歷保定同知有治行李

自成陷山西遣偽副將軍劉方亮由固關東犯畿輔震

動及真定游擊謝嘉福殺巡撫徐標反遣使迎賊人情

益洶洶宗元時攝府事亟集通判王宗周推官許曰可

清苑知縣朱永康後衛指揮劉忠嗣及鄉官張羅彥尹

洗等議城守復聞兼程馳入城宗元授以印復曰公部

署已定印仍佩之我相與僇力可也及謁文廟與諸生

講見危致命章詞氣激烈講畢登城分守都城陷之次日賊使投書誘降宗元手裂之明日賊大至絡繹三百里有數十騎服婦人衣言所過百餘城皆開門遠迎不降即屠且京師已破汝為誰守城上人聞之髮豎背裂賊環攻累日宗元等守甚堅賊稍稍引却督師大學士李建泰率殘卒數百輩餉銀十餘輜叩城求入宗元等不許建泰舉敕印示之宗元等曰荷天子厚恩御門賜劍酌酒餞別今不仗鉞西征乃叩關避賊耶建泰怒厲

聲叱呼且舉尚方劍脅之或請啟門宗元曰脫賊詐為之若何衆以御史金毓峒嘗監建泰軍識建泰推出視之信乃納之建泰入賊攻益厲建泰倡言曰勢不支矣姑與議降書牒迫宗元用印宗元抵印厲聲曰我為朝廷守土義不降欲降者任為之大哭引刀將自刎左右急止之皆雨泣羅彥前曰邪說勿聽速擊賊復自起藝西洋巨礮火發被燎幾死賊攻無遺力雉堞盡傾俄賊火箭中城西北樓復遂焚死南郭門又禁守者多散南

城守將王登洲縋城出降賊蜂擁而上建泰中軍副將郭中杰等為內應城遂陷宗元及中官方正化不屈死建泰率曰可永康出降忠嗣分守東城城將陷召女弟適楊千戶者歸與妻毛子婦王同處一室俱以弓弦縊殺之復登城拒守城破被執怒詈奪賊刀殺二賊賊膚至剜目剝鼻支解死一時武臣死事者守備則張大同與子之坦力戰死指揮則文運昌劉洪恩戴世爵劉元靖呂九章呂一照李一廣中軍則楊儒秀鎮撫則管民

治千戶則楊仁政李尚忠紀動趙世貴劉本源侯繼先
張守道百戶則劉朝卿劉悅田守正王好善強忠武王
爾祉把總則郝國忠申錫皆殉城死有呂應蛟者保定
右衛人歷官密雲副總兵謝事歸賊至中官正化知其
能延與共守晝夜戮力城破短兵鬪殺十餘賊而死

張羅俊字元美清苑人父純臣由武進士歷官署參將
神機營左副將生六子羅俊羅彥羅士羅善羅詰羅輔
羅俊娶瞿女終身不置妾羅彥字仲美舉崇禎二年進

士累遷吏部文選郎中楊嗣昌數借封疆事引用匪人
羅彥多駁正帝疑吏部行私厥卒常充庭曹郎多罹譴
者羅彥獨無所染秩滿遷光祿少卿被誣落職歸羅俊
以十六年秋舉進士羅輔亦以是年舉武進士而羅彥
少從父塞上習兵事初官行人奉使旋里鄉郡三被兵
佐當事守禦三著功給事中時敏奉使過其地夜半欲
入城羅彥不許敏劾其擅司鎖鑰羅彥疏辯帝不問十
七年二月賊逼京師衆議守禦羅彥兄弟與同知邵宗

元等歃血盟誓死守總兵官馬岱謁羅彥曰賊分兩道一出固關一趨河間吾當出屯蠡縣扼其衝先殺妻子而後往其城守悉屬公羅彥曰諾詰旦岱果殺妻孥十人率師去羅彥等糾鄉兵二千分陣守羅俊守東城羅彥西北羅輔為游兵公廩不足出私財佐之賊遣騎呼降羅俊顧其下曰欲降者取我首去後衛指揮劉忠嗣挺劍曰有不從張氏兄弟死守者齒此劍怒目髮上指聞者咸憤厲守益堅賊為引却已聞京師變衆皆哭

北向拜又羅拜相盟誓而賊攻益急城中多異議羅彥
謂宗元曰小民無知非鼓以大義氣不壯乃下令人綴
崇禎錢一枚於項以示戴主意賊謂羅彥主謀呼其名
大詬且射書說降羅彥不顧賊死傷多攻愈力李建泰
親軍為內應城遂陷羅俊猶持刀砍賊刀脫兩手抱賊
齧其耳血淋漓口吻間賊至益衆大呼我進士張羅俊
也遂遇害羅彥見賊入急還家大書官階姓名於壁投
繯死于晉與羅俊子伸並赴井死羅善字舜卿為諸生

佐兩兄守城城將陷兩兄戒勿死羅善曰有死節之臣
不可無死節之士妻高攜三女投井死羅善亦投他井
死羅輔多力善射晝夜乘城射必殺賊城破與羅俊奪
圍走羅俊不可羅輔連射殺數人矢盡持短兵殺數人
乃死張氏兄弟六人羅士早卒其妻高守節十七年至
是自經死惟羅詰從水門走免其妻王亦縊死羅俊伯
母李罵賊死羅彥妻趙二妾宋錢及晉妻師當圍急時
並坐井傍以待賊入皆先羅彥投井死獨趙不沈家人

出之羅輔妻白在母家聞變欲死侍者止之給以汲井
推幼女先入己從之羅俊再從子震妻徐巽妻劉亦投
井死一門死者凡二十三人

金毓峒字稗鶴保定衛人父銓戶部員外郎毓峒舉崇
禎七年進士授中書舍人十四年面陳漕務稱旨授御
史疏論兵部尚書陳新甲庸才悞國戶部尚書李待問
積病妨賢又請渙發德音自十五年始蠲除繁苛與海
內更新因言復社一案其人盡縫掖不可以一夫私怨

開禍端帝多採納明年出按陝西孫傳庭治兵關中吏民苦征繕日夜望出關天子亦屢詔督趣毓峒獨謂將驕卒悍未可輕戰抗疏爭帝不納師果敗十六年冬期滿得代甫出境而賊入關復還至朝邑覈上將吏功罪而後行明年三月召對命監李建泰軍馳赴山西抵保定賊騎已逼遂偕邵宗元等共守毓峒分守西城散家貲千餘金犒士其妻王亦出簪珥佐之京師變聞賊射書說降衆頗懈毓峒厲聲曰正當為君父復讐敢異議

者斬懸銀牌令擊賊者自取衆爭奮斃賊多城陷一賊
挽毓峒往謁其帥且罵且行遇井推賊仆地自墮井死
妻聞即自經其從子振孫有勇力以武舉佐守城賊至
衆皆散獨立城上大呼曰我金振孫前日殺數賊魁者
我也羣賊支解之振孫兄肖孫子婦陳與侍兒桂春亦
投井死肖孫匿毓峒二子為賊榜掠無完膚終不言二
孤獲免同時守城殉難者邠州知州韓東明武進士陳
國政赴井死平涼通判張維綱舉人張爾翬孫從範不

屈死舉人高經負母避難遇賊求釋母母獲釋而經被
執乘間赴水死貢生郭鳴世寢疾聞城陷整衣端坐賊
至持棒奮擊而死諸生王之珽先城陷一日置酒會家
人飲達旦城破偕妻齊及三子二女入井死諸生韓楓
何一中杜日芳王法等二十九人布衣劉宗向田仰名
劉自重等二十人或自經或溺或受刃皆不屈死婦人
盡節者一百十五人他若都給事中尹洗舉人劉會昌
貢生王聯芳以城陷次日為賊收獲亦不屈死賊揭其

首於竿書曰據城抗節惡官逆子見者飲泣

湯文瓊字兆鰲石埭人授徒京師見國事日非數獻策
闕下不報京師陷慨然語其友曰吾雖布衣獨非大明
臣子耶安忍見賊弑君篡國乃書其衣衿曰位非文丞
相之位心存文丞相之心投繯而卒福王時給事中熊
汝霖上疏曰北都之變臣傳詢南來者確知魏藻德為
報名入朝之首梁兆陽楊觀光何瑞徵為從逆獻謀之
首其他皆稽首賊庭乞憐恐後而文瓊以閭閻匹夫乃

能抗志捐生爭光日月賊聞其衣帶中語以責陳演即
斬演於市文瓊布衣死節賊猶重之不亟表章何以慰
忠魂勵臣節乃贈中書舍人祀旌忠祠時都城以布衣
盡節者又有范箴聽楊鉉李夢禧張世禧輩福王建國
喪亂益甚且見聞不詳未盡表章箴聽端方有義行高
攀龍講學都下受業其門魏國公徐允禎延為館賓數
進規諫允禎或倨見他客箴聽至輒斂容賊入置一棺
偃卧其上絕食七日死鉉善寫真京師陷攜二子赴井

死夢禧貞志節與妻杜二子二女一婢俱縊死世禧儒士也亦與二子懋賞懋官俱縊死又有周姓者悲憤槌胸嘔血數升而死而柏鄉人郝奇遇居京師聞變謂妻曰我欲死難汝能之乎妻曰能遂先死奇遇瘞畢服藥死

許琰字玉仲吳縣人幼有至性嘗刲臂療父疾為諸生磊落不羈聞京師陷帝殉社稷大慟誓欲舉義兵討賊走吉里薦紳皆不應端午日過友人出酒飲之琰擲杯

大詔曰今何日我輩讀聖賢書尚縱酒如平日耶拂衣徑去已聚哭明倫堂琰衰杖屨踊號泣盡哀御史謁文廟猶吉服琰率諸生責以大義御史惶悚謝罪去及南都頒監國詔而哀詔猶未頒琰益憤慟趨古廟自經為人所解乃步至胥門投於河潞王舟至拯之出詢其故嗟嘆良久識琰者掖以歸家人旦夕守不得死遂絕粒尋聞哀詔至即庭中稽首號慟并不復言以六月三日卒鄉人私謚曰潛忠先生南中贈五經博士祀旌忠祠

是時諸生殉義者京師則曹肅蘭衛卿周謙李汝翼大
同則李若葵金壇則王明灝丹陽則王介休難澤則殷
淵肥鄉則宋湯齊郭珩王拱辰肅曾祖子登仕為甘肅
巡撫賊入肅與祖母姜母張嫂李及弟持敏妹持順弟
婦鄧並自縊衛卿止一幼女託其友亦自縊謙被執罵
賊不屈死汝翼布政使本緯子亦罵賊被磔死若葵與
親屬九人皆自縊題曰一門完節明灝聞變日夕慟哭
家人解慰之託故走二十里外投水死介休不食七日

死淵字仲弘父大白官監軍副使為楊嗣昌所殺淵負
奇氣從父兵間善技擊嘗欲報父讐及賊破難澤謀起
兵恢復俄聞京師陷即同諸生黃祐等悲號發喪約山
中壯士誅賊所置官偽令秦植踉蹌走乃入城行哭臨
禮義聲大震為奸人所乘被殺遠近悼之湯齊珩拱辰
亦起兵討賊為賊將張汝行所害

王喬棟雄縣人舉進士授朝邑知縣縣人王之宋為魏
忠賢黨所惡坐以賊下喬棟嚴徵喬棟不忍封印於庫

而去巡撫怒將劾之士民擁署號呼乃止崇禎初起順
天教授累遷湖廣參政楚中大亂諸道監司多不至喬
棟兼綰數篆乙酉夏李自成據武昌喬棟時駐興國州
城為賊陷自經城樓上

張繼孟字伯功扶風人萬歷末年進士知灘縣天啟三
年擢南京御史未出都奏籌邊六事末言已被抑南臺
由錢神世界公道無權宜嚴禁饋遺帝令實指繼孟以
風聞對詔詰責之左都御史趙南星言今天下進士重

而舉貢輕京官重而外官輕在北之科道重而南都輕
乞因繼孟言思偏重之弊敕下吏部極力挽回於用人
不為無補於是忌者咸指目繼孟為東林尋以不建魏
忠賢祠斥為邪黨削奪歸崇禎二年起故官上言近見
冢臣王永光人言踵至一疏語語謬戾其曰惠世揚等
借題當議夫云借者無其事而借名也世揚與楊漣左
光斗同事同心但未同死耳今楊左業有定議世揚方
昭揭於天下後世奈何以借名之謬一又曰高捷史塗

發奸已驗特用宜先夫捷莖之糾劉鴻訓也為楊維垣等報讐耳鴻訓輔政止此一事快人意其後獲罪以納賄非以捷莖効也今指護奸者為發奸謬二又曰諸臣所擁戴者錢謙益李騰芳孫慎行夫謙益本末陛下近亦洞然至騰芳慎行天下共推服會推之時永光負主其議乃指公論為擁戴謬三又曰欲諸臣疎一面網息天下朋黨之局信斯言也則部議漏張文熙等數十人是為疎網而陛下嚴核議罪反開朋黨之局乎謬四且

永光先為御史李應昇所糾今又為御史馬孟正徐尚
勛等所論而推轂永光者先為崔呈秀徐大化今則霍
維華楊維垣張文熙其賢不肖可知矣後又劾南京兵
部尚書胡應台貪污帝並不納永光深疾之出為廣西
知府土酋普名聲久亂未靖繼孟設計酖之一方遂安
稍遷浙江鹽運使忤視鹽內官崔璘左遷保寧知府尋
進副使分巡川西十七年八月張獻忠寇成都與陳其
赤張孔教鄭安民方堯相等佐巡撫龍文光協守城陷

被執獻忠僭帝號欲用諸人備百官繼孟等不為屈乃
被殺妻賈從之其赤字石文崇仁人崇禎元年進士歷
兵備副使轄成都城陷投百花潭死家人同死者四十
餘人孔教字魯生會稽人舉於鄉歷四川僉事不屈死
子以衡奉母孔南竄匿不使知踰年母詣以衡書室見
副使周夢尹請孔教卹典疏隕絕罵以衡曰父死二載
我尚偷生使我無顏見汝父地下遂取刀斷喉死安民
浙江貢生歷蜀府左長史賊圍成都分守南城城陷不

屈死堯相字紹虞黃岡人官成都同知監紀軍事兵食不足泣請於蜀王王不允自投於池以救免次日城陷被殺於萬里橋下總兵劉佳蔭亦盡節

劉士斗字瞻甫南海人崇禎四年進士知太倉州有政聲忤上官中計典謫江西按察司知事擢成都推官十六年御史劉之勃薦為建昌兵備僉事明年八月賊將入境之勃促之行士斗曰安危生死與公共復何往城陷被執見之勃與張獻忠語大呼曰此賊也公不可少

屈獻忠怒命梓以下士斗又返顧之勃語如前遂闔門
被殺同時沈雲祚字子凌太倉人崇禎十三年進士知
華陽縣有奸民為猺黃賊耳目設策捕戮之賊破夔門
成都大震雲祚走謁蜀王陳守禦策不聽聞內江王至
淥賢往說之曰成都危在旦夕而王府貨財山積不及
今募士殺賊疆場淪喪誰為王守至淥言於王不聽賊
迫成都王始出財佐軍已無及城陷獻忠欲用之幽之
大慈寺而遣其黨饋食以刃脅降不屈遂遇害

王勵精蒲城人崇禎中由選貢生授廣西府通判仁恕
善折獄歲凶毀銀帶易粟減價糶富人聞之爭出粟價
遂平遠崇慶知州多善政十七年張獻忠陷成都州人
驚竄勵精朝服北面拜又西向拜父母從容操筆書文
天祥成仁取義四語於壁登樓縛利刃柱間而置火藥
樓下危坐以俟俄聞賊騎渡江即命舉火火發觸刃貫
胸而死賊歎其忠斂葬之其墨迹久逾新滌之不滅後
二十餘年州人建祠奉祀祀甫畢壁即頽遠近歎異先

是十三年賊犯仁壽知縣鄱陽劉三策拒守城陷不屈
死贈尚寶司丞及是再陷知縣顧繩貽遇害賊陷郫縣
主簿山陰趙嘉煒守都江堰賊誘降不從投江死陷縣
竹典史卜大經與其僕俱縊死鄉官戶部郎中刁化神
亦死之他若榮縣知縣漢陽秦民湯蒲田知縣江夏朱
蘊羅興文知縣漢川艾吾鼎南部知縣鄭夢眉中江教
諭攝劍州事單之賓皆殉難夢眉夫婦並縊蘊羅吾鼎
閩家被難宗室朱奉錚由進士歷御史劾督師丁啟睿

諸疏為時所稱時里居并及於難

尹伸字子求宜賓人萬歷二十六年進士授承天推官
屢遷南京兵部郎中西安知府陝西提學副使蘇松兵
備參政公廉強直不事媿阿三任皆投劾去天啟時起
故官分守貴州威清道貴陽圍解巡撫王三善將深入
伸頗贊之監軍西征三善敗歿伸突圍歸坐奪官戴罪
辨賊四年賊圍普安伸赴援賊解去遂移駐其地賊復
來攻率參將范邦雄破走之遂北至三岔河總督蔡復

一上其功免戴罪貶一秩視事崇禎五年歷河南右布政使以失禦流賊罷歸伸所至與長吏迂然待人有始終篤分義工詩善書日課楷書五百字寒暑不輟張獻忠陷敘州匿山中搜得之罵不肯行賊重其名不殺至井研罵益厲遂攢殺之福王時起太常卿伸已先死蜀中士大夫在籍死難者成都則雲南按察使莊祖誥廣元則戶科給事中吳宇英資縣則工部主事蔡如憲耶縣則舉人江騰龍而安岳進士王起義渠縣禮部員外

郎李含乙皆舉義兵討賊不克死

高其勲字懋功初襲千戶後舉武鄉試為黔國公標下
中軍吾必奎反擢參將守禦武定及沙定洲再反分兵
來攻固守月餘城陷衣冠望北拜服毒死時有陳正者
世為大理衛指揮未嗣職沙賊陷城督衆巷戰手誅數
賊而死王承憲者襲祖職為楚雄衛指揮擢遊擊為副使楊
畏知前鋒定洲來攻承憲綜理守禦事畏知深倚之賊
去復至承憲偕土官那審等出城衝擊賊皆披靡俄為

流矢所中死弟承瑱力戰死一軍盡歿賊進圍大理時

太和縣丞王士傑佐上官畢力捍禦城陷死城上同死

者大理府教授段見錦經歷楊明盛及子一甲司獄魏

崇治而故永昌府同知蕭時顯解任以道阻寓居大理

亦自經士人同死者舉人則高拱極投池死楊士俊同

母妻妹自焚死諸生則尹夢旗夢符馮大成倡義助守

罵賊死楊憲偕妻女子婦姪女孫女弟婦一門自焚死

楊慈既死復甦妻竟死人稱太和節義為獨盛云單國

祚者會稽人爲通海典史城陷握印坐堂上罵賊被殺
印猶在握縣人葬之諸葛山下

張耀字融我三原人萬歷中舉於鄉知聞喜縣慈惠撫
民民爲立祠崇禎中歷官貴州布政使張獻忠死其部
將孫可望李定國等率衆奔貴州耀急言於巡撫請發
兵民守禦巡撫以衆寡不敵難之俄賊衆奄至耀率家
衆乘城拒擊城陷被執賊帥與耀皆秦人說之曰公若
降當用爲相耀怒詈不屈賊執其妾媵恠之曰降則免

一家死耀言益甚賊殺之并其家屬十三人時鄉官吳

子騏劉瑄楊元瀛等率鄉兵敗賊賊來益衆戰敗被執

俱不屈死子騏字九達貴陽人萬歷中舉於鄉知興寧

縣天啟時安邦彥圍貴陽子騏以母在城內倉皇棄官

歸崇禎十年蠻賊阿烏謎叛陷大方城逐守將總督朱

燮元屬子騏詣六廣走書召諸目曉以利害果乞降燮

元上其功優旨獎賞瑄戶部主事元瀛府同知並起家

鄉舉同時譚先哲平壩衛人子騏同年生也官戶部郎

中賊陷其城與里人石聲和皆闔家殉難聲和天啟中
舉於鄉官寧前兵備參議有顧人龍者定番州人嘗出
仕解職家居流賊來犯率士民拒守殺賊甚衆城破大
罵而死可望寇安平僉事臨川曾益集衆拒守城陷死
之曾異撰榮昌人舉於鄉知永寧州可望既陷貴州將
長驅入雲南異撰與其客江津進士程玉成貢生龔茂
勲謀曰州據盤江天險控扼滇黔棄之不守事不可為
矣遂集衆登陴守城陷自焚死

米壽圖宛平人崇禎中由舉人知新鄉縣土寇來犯督吏民破走之斬首千二百餘級以治行徵授南京御史十五年四月極論監軍張若騏罪言若騏本不諳軍旅諂附楊嗣昌遂由刑曹調職方督臣洪承疇孤軍遠出若騏任意指揮視封疆如兒戲虛報大捷躡光祿卿冒功罔上恃鄉人謝陞為內援陞奸險小人非與若騏駢斬何以慰九廟之靈會廷臣多糾若騏遂論死陞亦除名初嗣昌倡練兵之議擾民特甚壽圖疏陳十害又言

往時督撫多用京卿今封疆不靖遇卿貳則爭先推督
撫則引避宜嚴加甄別內外兼補因劾偏沅巡撫陳睿
謨廣西巡撫林贊貪黷帝納其言甲申年五月福王立
馬士英薦用阮大鍼壽圖論劾七月出按四川時川地
已為張獻忠所據命吏部簡堪任監司守令者從壽圖
西行至則與督師王應熊總督樊一蘅等聯絡諸將號
召遠近漸復川南郡縣唐王立擢右僉都御史巡撫貴

州

大清順治四年獻忠遺黨孫可望等陷貴陽壽圖出奔沅州十一年沅州亦陷壽圖死之

耿廷錄臨安河西人天啟四年舉於鄉崇禎中知耀州有能聲十五年夏疏陳時政言將多不若將良兵多不若兵練餉多不若餉核又言諸臣恩怨當忘廉恥當勵小怨必報何不大用於斷頭飲血之元兇私恩必酬何不廣用於鵠面鳩形之赤子優旨褒納擢山西僉事改監宣府軍十七年京師陷走南都十一月以張獻忠亂

四川命加太僕少卿赴雲南監沙定洲軍由建昌入川討賊明年三月四川巡撫馬乾罷即拜廷錄右僉都御史代之未赴而定洲作亂蜀地亦盡失遂止不行後李定國掠臨安過河西廷錄聞之赴水死妻楊被執亦不屈死馬乾者昆明人舉崇禎六年鄉試為四川廣安知州夔州告警巡撫邵捷春檄乾攝府事張獻忠攻圍二十餘日固守不下督師楊嗣昌兵至圍始解擢川東兵備僉事成都陷巡撫龍文光死蜀人共推乾攝巡撫事

賊陷重慶留其將劉廷舉戍守乾擊走之復其城督師
王應熊劾乾淫掠奪職提訊會蜀地大亂詔命不至乾
行事如故乃傳檄遠近協力討賊廷舉既敗去賊遣劉
文秀等以數萬衆來攻乾固守曾英等援兵至賊敗還
及獻忠死其黨孫可望等南奔我

大清兵追至重慶乾戰敗而死

席上珍姚安人崇禎中舉於鄉磊落尚節義聞孫可望
李定國等入雲南與姚州知州何思大姚舉人金世鼎

據姚安城拒守可望遣張虎攻陷之世鼎自殺上珍思
被執至昆明可望呵之上珍厲聲曰我大明忠臣肯為
若屈耶可望怒命引出斬之大罵不絕遂磔於市思亦
不屈死有孔師程者昆明人以從軍得官至是糾合晉
寧呈貢諸州縣起兵拒賊定國率衆奄至師程遁晉寧
知州石阡冷陽春呈貢知縣嘉興夏祖訓並死之晉寧
舉人段伯美諸生余繼善耿希哲助陽春城守亦殉難
賊陷富民貢生李開芳妻及二子俱赴井死開芳走至

松花壩自經其友王朝賀掩埋訖亦自經在籍知縣陳
昌裔不受偽職為賊杖死楚雄舉人杜天禎初佐楊畏
知拒沙賊頻有功後畏知督兵擊可望敗績天禎聞之
即自盡臨安之陷進士廖履亨赴水死

徐道興睢州人崇禎末官雲南都司經歷署師宗州事
廉潔愛民孫可望等入雲南破曲靖巡按羅國瓛方按
部其地與知府焦潤生被執可望欲降之國瓛不屈攜
至昆明自焚死潤生亦不屈死道興見賊逼集士民諭

之曰力薄兵寡不能抗賊吾死分也若等可速去民請
偕行道興厲聲曰封疆之臣死封疆吾將安之衆雨泣
辭去舍中止一僕出俸金二錠授之曰一以賜汝一買
棺斂我僕大哭請從死道興曰爾死誰收吾骨僕叩頭
號泣乃去及賊入署令出迎其將道興大罵擲酒杯擊
之罵不絕口遂被殺國璫嘉定州人崇禎十六年進士
潤生修撰竝子同時張朝綱廣通人由貢生授渾源州
同知解職歸可望等兵至與其妻馮並縊死子諸生耀

葬親訖亦縊死

劉廷標字霞起上杭人王運開字子朗夾江人廷標由貢生歷永昌府通判運開舉於鄉授永昌推官沙定洲之亂黔國公沐天波走永昌及孫可望等入雲南馳檄諭天波降時運開攝監司事廷標攝府事方發兵守瀾滄而天波將遣子納款諭兩人以印往兩人堅不予各遣家人走騰越永昌士民聞賊所至屠戮號泣請運開納款紓禍運開不可慰遣之又詣廷標廷標亦不可衆

大哭廷標取毒酒將飲乃散去兩人相謂曰衆情如此
吾輩惟一死自靖耳是夕運開自經廷標聞之曰我老
當先死王公乃先我遂沐浴賦詩三章亦自經兩家子
弟自騰越來奔喪厝畢復返可望等重兩人死節求其
後或以運開弟運閔對即聘之行至潞江謂其僕曰吾
兄弟可異趣耶吾死若收吾骨與兄合葬遂躍入江死

明史卷二百九十五

欽定四庫全書

明史卷二百九十五考證

何復傳復遂焚死

臣

方煒按何復及邵宗元劉忠嗣

張大同文運昌劉洪恩戴世爵劉元靖呂九章呂一

照李一廣楊儒秀呂應蛟

賜謚俱另載卷末謹識

何復傳一時武臣死事者守備則張大同與子之坦力
戰死指揮則文運昌劉洪恩戴世爵劉元靖呂九章

呂一照李一廣中軍則楊儒秀鎮撫則管民治千戶
則楊仁政李尚忠紀動趙世貴劉本源侯繼先張守
道百戶則劉朝卿劉悅田守正王好善強忠武王爾
祉把總則郝國忠申錫皆殉城死者呂應蛟者保定
右衛人歷官密雲副總兵謝事歸賊至中官正化知
其能延與共守晝夜戮力城破短兵鬪殺十餘賊而
死

臣方煒按張之坦管民治楊仁政李尚忠紀動
趙世貴劉本源侯繼先張守道劉朝卿劉悅田守正

王好善強忠武王爾祉郝國忠申錫俱

賜祀忠義祠謹識

張羅俊傳

弟羅彥等附

被誣落職歸

臣

方煒按崇禎

長編是時羅彥同邑少卿史堃坐賊瘦死忌者誣羅
彥私堃遂落職所謂被誣者指此謹識

張羅俊傳

弟羅彥等附

羅俊猶持刀砍賊刀脫兩手抱

賊齧其身血淋漓口吻間賊至益衆大呼我進士張
羅俊也遂遇害羅彥見賊入急還家大書官階姓名

于壁投繯死子晉興羅俊子伸並赴井死

臣方煒

按張羅俊及張羅彥

賜謚俱另載卷末謹識

張羅俊傳

弟羅彥等附

羅善字舜卿為諸生佐兩兄守

城城將陷兩兄戒勿死羅善曰有死節之臣不可無死節之士妻高攜三女投井死羅善亦投他井羅輔多力善射晝夜乘城射必殺賊城破與羅俊奪圍走羅俊不可羅輔連射殺數人矢盡持短兵殺數人乃

死 臣方煒按張羅善張羅輔張晉張伸俱

賜祀忠義祠謹識

金毓峒傳遇井推賊仆地自墮井死妻聞即自經其從
子振孫有勇力以武舉佐守城賊至衆皆散獨立城
上大呼曰我金振孫前日殺數賊魁者我也羣賊支
解之振孫兄肖孫子婦陳與侍兒桂春亦投井死肖
孫匿毓峒二子為賊擄掠無完膚終不言二孤獲免

臣方煒按金毓峒及韓東明張維綱尹洗

賜謚俱另載卷末謹識

金毓峒傳 韓東明等附

同時守城殉難者邠州知州韓

東明武進士陳國政赴井死平涼通判張維綱舉人

張爾暈孫從範不屈死舉人高經負母避難遇賊求

釋母母獲釋而經被執乘間赴水死貢生郭鳴世寢

疾聞城陷整衣端坐賊至持棒奪擊而死諸生王之

珽先城陷一日置酒會家人飲達旦城破偕妻齊及

三子二女入井死諸生韓楓何一中杜日芳王法等

二十九人布衣劉宗向田仰名劉自重等二十人或
自經或溺或受刃皆不屈死婦人盡節者一百十五
人他若都給事中尹洗舉人劉會昌貢生王聯芳以
城陷次日為賊收獲亦不屈死

臣方煒按金振孫

肖孫陳國政張爾翬孫從範高經郭鳴世王之珽韓
楓何一中杜日芳王法劉宗向田仰名劉自重劉會
昌王聯芳俱

賜祀忠義祠謹識

金毓峒傳 韓東明等附 他若都給事中田洗 臣方燁

按洗安肅人天啟二年進士授祥符令未任補蒲圻
調繁洛陽擢禮科給事中以忤璫出為福建建寧參
政罷歸家居遇害見畿輔通志謹附識

湯文瓊傳投繯而卒福王時給事中熊汝霖上疏曰北
都之變臣傳詢南來者確知魏藻德為報名入朝之
首梁兆陽楊觀光何瑞徵為從逆獻謀之首其他皆
稽首賊庭乞憐恐後而文瓊以閭閻匹夫乃能抗志

捐生爭光日月賊聞其衣帶中語以責陳演即斬演
於市文瓊布衣死節賊猶重之不亟表章何以慰忠
魂勵臣節乃贈中書舍人祀旌忠祠時都城以布衣
盡節者又有范箴聽楊鉉李夢禧張世禧輩 臣方
煒按湯文瓊及范箴聽楊鉉李夢禧張世禧張懋賞
懋官周某郝奇遇俱

賜祀忠義祠謹識

許琰傳以六月三日卒

臣方煒按紀事本末稱琰聞

京之變遍體書崇禎聖主四字絕粒七日而死謹附識

許琰傳

曹肅等附

是時諸生殉義者京師則曹肅蘭衛

卿周謙李汝翼大同則李若葵金壇則王明灝丹陽則王介休雞澤則殷淵肥鄉則宋湯齊郭珩王拱辰臣方煒按許琰及曹肅蘭衛卿周謙李汝翼李若葵王明灝王介休殷淵宋湯齊郭珩王拱辰俱

賜祀忠義祠謹識

許琰傳淵字仲宏父大白官監軍副使為楊嗣昌所殺

臣方煒按大白為興安路監軍是時嗣昌會師襄陽張獻忠羅汝才等入營遁鄖陽興安山間遂斬大白並鞭副將刀明忠以殉見綏寇紀畧謹附識

王喬棟傳自經城樓上

臣方煒按王喬棟

賜謚另載卷末謹識

張繼孟傳奏籌邊六事

臣方煒按繼孟所陳六事明

紀事本末諸書皆無可考謹識

張繼孟傳繼孟等不為屈乃被殺妻賈從之

臣方煒

按是年六月賊陷重慶七月龍文光與總兵劉佳廕
從川北來成都謀設守賊騎兵從資陽水兵從洪雅
新津薄城下佳廕出戰大敗賊四面縱火文光急遣
人往灌縣決堰注城壕賊攻愈厲西北城樓破比水
至而城已陷見綏寇紀畧謹附識

張繼孟傳

陳其赤等附

其赤字石文崇仁人崇禎元年

進士歷兵備副使轄成都城陷投百花潭死家人同

死者四十餘人孔教字魯生會稽人舉于鄉歷四川
僉事不屈死子以衡奉母孔南竄匿不使知踰年母
詣以衡書室見副使周夢尹請孔教卹典疏隕絕罵
以衡曰父死二載我尚偷生使我無顏見汝父地下
遂取刀斷喉死安民浙江貢生歷蜀府左長史賊圍
成都分守南城城陷不屈死堯相字紹虞黃岡人官成
都同知監紀軍事兵食不足泣請于蜀王王不允自
投于池以救免次日城陷被殺于萬里橋下總兵劉

佳蔭亦盡節

臣

方煒按張繼孟及陳其赤張孔教

鄭安民方堯相劉佳蔭

賜謚俱另載卷末謹識

劉士斗傳御史劉之勃薦為建昌兵備僉事

臣方煒

按之勃綏寇紀畧諸書作之渤與此互異謹附考

劉士斗傳見之勃與張獻忠語大呼曰此賊也公不可

少屈獻忠怒命梓以下

臣方煒按之勃被賊以同

鄉故欲用之不屈縛于端禮門外擯矢射之至死罵

不絕聲見之勃本傳謹附識

劉士斗傳

沈雲祚附

以刃脅降不屈遂遇害

臣方煒

按劉士斗及沈雲祚

賜謚另載卷末謹識

王勵精傳

劉三策等附

火發觸刃貫胸而死

臣方煒按

王勵精及劉三策顧繩貽刃化神秦民湯朱蘊羅

艾吾鼎鄭夢眉單之賓朱奉鉞趙嘉煒卜大經

賜謚俱另載卷末謹識

王勵精傳賊犯仁壽知縣鄱陽劉三策拒守城陷不屈
死贈尚寶司丞及是再陷知縣顧繩貽遇害賊陷郢
縣主簿山陰趙嘉煒守都江堰賊誘降不從投江死
陷縣竹典史卜大經與其僕俱縊死鄉官戶部郎中
刁化神亦死之他若榮縣知縣漢陽秦民湯蒲田知
縣江夏朱蘊羅興文知縣漢川艾吾鼎南部知縣鄭
夢眉中江教諭攝劍州事單之賓皆殉難夢眉夫婦
並縊蘊羅吾鼎闔家被難宗室朱奉鈿由進士歷御

史劾督師丁啟睿諸疏為時所稱時里居并及于難

臣方煒按趙嘉煒卜大經俱

賜祀忠義祠謹識

尹伸傳

莊祖誥等附

至井斫罵益厲遂攢殺之

臣方

煒按尹伸及莊祖誥吳宇英蔡如蕙王起義李含乙
賜謚俱另載卷末謹識

尹伸傳

莊祖誥等附

蜀中士大夫在藉死難者成都則

雲南按察使莊祖誥廣元則戶科給事中吳宇英資

縣則工部主事蔡如蕙郫縣則舉人江騰龍而安岳
進士王起莪渠縣禮部員外郎李含乙皆舉義兵討
賊不克死

臣方煒按江騰龍

賜祀忠義祀謹識

高其勲傳及沙定洲再反分兵來攻固守月餘城陷衣
冠望北拜服毒死

臣方煒按是時定洲作亂據雲

南會城黔國公沐天波奔永昌定洲追之間兵巡道

楊畏知據楚雄起兵討賊乃留圍楚雄不能克孫可

望在貴州間雲南亂兼程趨滇定洲急收兵還阿迷
與可望遇于蛇花口大敗遁去可望遂取雲南見紀
事本本謹附識

高其勲傳

陳正等附

時有陳正者世為大理衛指揮未

嗣職沙賊陷城督衆巷戰手馘數賊而死王承憲者
襲祖職為楚雄衛指揮擢遊擊為副使楊畏知前鋒定洲
來攻承憲綜理守禦事畏知深倚之賊去復至承憲
偕土官那齋等出城衝擊賊皆披靡俄為流矢所中

死弟承瑱力戰死一軍盡歿賊進圍大理時太和縣丞王士傑佐上官畢力捍禦城陷死城上同死者大理府教授段見錦經歷楊明盛及子一甲司獄魏崇治而故永昌府同知蕭時顯解任以道阻寓居大理亦自經

臣方煒按高其勲及陳正王承憲蕭時憲

賜謚俱另載卷末謹識

高其勲傳士人同死者舉人則高拱極投池死楊士俊同母妻妹自焚死諸生則尹夢旗夢符馮大成倡義

助守罵賊死楊憲偕妻女子婦姪女孫女弟婦一門
自焚死楊孫既死復甦妻竟死人稱太和節義為獨
盛云單國祚者會稽人為通海典史城陷握印坐堂
上罵賊被殺印猶在握縣人葬之諸葛山下臣方

煒按王承瑱王士傑段見錦楊明盛楊一甲魏崇治
高拱極楊士俊楊德尹夢旗夢符馮大成楊憲單國祚俱

賜謚忠義祠謹識

張耀傳

吳子騏等附

耀嘗益甚賊殺之

臣方煒按張

耀及吳子騏劉琯楊元瀛譚先哲石聲和曾益曾異
撰

賜謚俱另載卷末謹識

張耀傳 吳子騏等附

有顧人龍者定番州人嘗出仕解

職家居流賊來犯率士民拒守殺賊甚衆城破大罵
而死可望寇安平僉事臨川曾益集衆拒守城陷死
之 臣方煒按顧人龍

賜祀忠義祠謹識

米壽圖傳初嗣昌倡練兵之議擾民特甚壽圖疏陳十害臣方煒按壽圖所陳十害崇禎長編及紀事本末諸書皆無可考謹識

米壽圖傳至則與總督師王應熊總督樊一蘅等聯絡諸將號召遠近漸復川南郡縣臣方煒按是時應熊等避地遵義會巡撫馬乾復重慶松潘副將朱化龍與一蘅乃起舊將甘良臣為總統合諸將楊展余朝

宗等以乙酉三月復叙州旋取嘉定邛眉總兵賈聯

登等取資州簡天錫高名佐取瀘州李占春于大海
守忠浩副將曹英復破賊兵數萬其他洪雅松茂夔
萬皆受一衛節制見紀事本末所謂漸復川南郡縣
者指此謹附識

米壽圖傳沅州亦陷壽圖死之

臣方煒按米壽圖

賜謚另載卷末謹識

耿廷錄傳馬乾附

廷錄聞之赴水死

臣方煒按耿廷

錄及馬乾龍文光

賜謚俱另載卷末謹識

又馬乾固守曹英等援兵至賊敗還及獻忠死其黨孫可望等南奔

大清兵追至重慶乾戰敗而死

臣方煒按是時英與叅

政劉鱗長自遵義至與李占春于大海張天相等奮力夾擊大破之見紀事本末謹附識

席上珍傳 何思等附

上珍厲聲曰我大明忠臣肯為若

屈耶可望怒命引出斬之大罵不絕遂磔于市思亦

不屈死

臣方煒按席上珍及金世鼎段伯美余繼

善耿希哲李開芳王朝賀杜天禎俱

賜祀忠義祠謹識

席上珍傳

何思等

附晉寧知州石阡冷陽春呈貢知縣嘉興

夏祖訓並死之晉寧舉人段伯美諸生余繼善耿希

哲助陽春城守亦殉難賊陷富民貢生李開芳妻及

二子俱赴井死開芳走至松花壩自經其友王朝賀

掩埋訖亦自經在籍知縣陳昌裔不受偽職為賊杖

死楚雄舉人杜天禎初佐楊畏知拒沙賊頗有功後
畏知督兵擊可望敗績天禎聞之即自盡臨安之陷
進士廖履亨赴水死 臣方煒按何思冷陽春夏祖
訓陳昌裔廖履亨

賜謚俱另載卷末謹識

徐道興傳孫可望等入雲南破曲靖 臣方煒按是年

三月可望等由黔入滇屠霑益州進破曲靖亦屠之

見紀事本末謹附識

徐道興傳 羅國璫等附 道興大罵擲酒杯擊之罵不絕

口遂被殺國璫嘉定州人崇禎十六年進士潤生修
撰竝子同時張朝綱廣通人由貢生授渾源州同知
解職歸可望等兵至與其妻馮並縊死 臣方煒按
徐道興及羅國璫焦潤生張朝綱

賜諡俱另載卷末謹識

徐道興傳 羅國璫等附 耀 葬親訖亦縊死 臣方煒按張

耀

賜謚忠義祠謹識

劉廷標傳

王運開等附

運開自經廷標聞之曰我老當

先死王公乃先我遂沐浴賦詩三章亦自經

臣方

煒按劉廷標王運開

賜謚俱另載卷末謹識

劉廷標傳

王運開等附

或以運開弟運閔對即聘之行

至潞江謂其僕曰吾兄弟可異趣耶吾死若收吾骨

與兄合葬遂躍入江死

臣方煒按王運閔

賜祀忠義祠謹識

明史卷二百九十五考證

附明史卷二百九十五考證後

乾隆四十一年

賜謚諸臣

邵宗元 劉忠嗣 金毓峒 沈雲祚 李含乙

張耀 羅國楸

以上通謚忠烈

張繼孟 尹伸 吳宇英 米壽圖 耿廷錄

馬乾 龍文光

以上通謚忠節

何復 張大同 楊儒秀 張羅俊 張維綱

尹洗 張孔教 劉佳蔭 劉士斗 王勵精

劉三策 秦民湯 朱蘊羅 艾吾鼎 單之賓

朱奉鈿 莊祖誥 王起義 陳正 王承憲

吳子騏 譚先哲 曾異撰 冷陽春 徐道興

以上通謚忠愍

呂應蛟 文運昌 劉洪恩 戴世爵 劉元靖

呂九章

呂一照

李一廣

張羅彥

韓東明

王喬棟

陳其赤

鄭安民

方堯相

顧繩貽

刁化神

鄭夢眉

蔡如蕙

高其勲

蕭時顯

劉琯

楊元瀛

石聲和

曾益

何思

夏祖訓

陳昌裔

廖履亨

焦潤生

張朝綱

劉廷標

王運開

以上通謚忠愍

欽定四庫全書薈要卷六千八百八十九

史部

明史卷二百九十六

大學士張廷玉等奉 敕修

列傳第一百八十四

孝義

孝義之行雖曰天性豈不賴有教化哉自聖賢之道明
誼辟英君莫不汲汲以厚人倫敦行義為正風俗之首
務旌勸之典貴於閭閻下逮委巷布衣之氓匹夫匹婦

兒童穉弱之微賤行修於閨闈之中而名顯於朝廷之上觀其至性所激感天地動神明水不能濡火不能熬猛獸不能害山川不能阻名留天壤行卓古今足以扶樹道教敦厲末俗綱常由之不泯氣化賴以維持是以君子尚之王政先焉至或刑政失平復讐洩忿或遭時不造荒盜流離誓九死以不回冒白刃而弗顧時則有司之辜民牧之咎為民上者當為之惻然動念故史氏志忠孝義烈之行如恐弗及非徒以發側陋之幽光亦

以覘世變昭法戒焉明太祖詔舉孝弟力田之士又令

府州縣正官以禮遣孝廉士至京師百官聞父母喪不待報得去官割股臥冰傷生有禁其後遇國家覃恩海內輒以詔書從事有司上禮部請旌者歲不乏人多者十數激勸之道綦云備矣實錄所載莫可殫述今採其尤者輯為傳餘援唐書例臚其姓氏如左其事親盡孝或萬里尋親或三年廬墓或聞喪隕命或負骨還鄉者洪武時則有麗水祝崑上元徐真童李某女龍江衛丁

歪頭懷寧曹鏞鏞妻王氏徐州王僧兒廣德姚觀壽廣
武衛陳禮關桃源張注江浦張二女勝奴上海沈德溧
陽史以仁丹徒唐川邳州李英北平東安王重遵化張
拾保定顧仲禮樂亭杜仁義妻韓氏昌平劉驢兒保定
新城王興祁陽郝安童山東寧海姜瑜汶上侯昱孟縣
李德鞏縣給事中魏敏登封王中舞陽周炳臨桂李文
選而鈞州張宗魯以瞽子有孝行十七年被旌永樂間
則有大興王萬僧奴東光回滿住金吾右衛何黑廝金

吾後衛包三武功中衛蔣小保周阿狗錦州衛趙興祖

旗手衛周來保大寧前衛滑中保安衛徐宗賢羽林前

衛孫志漢府左護衛千戶許信子斌江寧浦阿住沈得

安嚴分保上元馮添孫邵佛定上海沈氏妙蘭儀真韓

福緣江陰衛徐佛保府軍衛浦良兒府軍後衛王保兒

潘丑兒水軍右衛黃阿回廣武衛百戶劉玉蘇州衛張

阿童廣洋衛鄭小奴大河衛朱阿金興武衛張彥昇龍

江提舉司匠張貴胡佛保肅廣永新左興兒濟陽張思

名泰安張翼肥城趙讓安邑張普圓永寧王仕能陽武
劉大靈寶賀貳鈞州素節膚施陳七兒鳳翔梁準洪熙
間則有江陰趙鉉宣德間則有慶都邊靖南樂康祥楊
鐸內黃崔克昇江寧張繼宗定遠王綱舒城錢敏徐州
衛張文友歸德衛任貴浮梁洪信文堂邑趙巖汶上馬
威翼城劉原真太康順孫陳智鈞州楊鼎延安衛指揮
王永安岳李遇中正統間則有大興劉懷義元城谷真
邢臺劉鏞獻縣崔鑑通州左衛總旗孫雄昌黎侯顯新

樂孫禮定興魏整交河田峻柏鄉張本歸德楊敬井陘
畢鸞永年楊忠永清右衛穆弘武驤左衛成貴江寧顧
賜舒城吏部主事胡紀御史王紹盧江張政武進胡長
寧徐州金嵩王豫桐城檀郁歸德衛呂仲和麻城趙說
聊城裴俊陵縣虎賁左衛經歷張讓費縣葛子成樂安
孫整冠縣陳勉清臨賈貴郟城郭秉東平張琛德州張
泰平陰王福緣猗氏王約高平王起孝太僕丞王燧介
休楊智興縣郭安朔州衛吳順杞縣高朗太康軒茂良

鄭州邢恭祥符李斌鳳翔石玫膚施劉友得張信邠州

郭元延安衛薛廣南州吳仕坤景泰間則有成安張憲

威縣傅海邠州岑義鳳陽李忠徐州朱環宿州郭興李

寬泗州衛蔡興龍泉顧佛僧龍游常州通判徐珙武昌

衛吳綬靖州衛方觀鄆城李達朝城王禮聊城朱舉洛

陽昌黎訓導間禹錫天順間則有宛平龔然勝遷安蔣

盛永清賈懋任邱黃文唐縣寇林大寧指揮張英平山

衛房鎮忠義衛總旗鍾通潼關衛楊順通順素蒙城汪

泉六合胡琛合肥高興張俊和州獲嘉知縣薛良上元
龍景華杭州姚文姚得平湖夔州知府沈琮金華宗社
德州尹綸東昌許通臨汾續鳳絳州陳璽鄆陵解禮順
孫張縉上蔡朱儉同州侯智醴泉張璉西安前衛張軫
延安衛指揮柏英太和楊寧金齒衛徐訥成化間則有
神機營指揮方榮太醫院生安陽郭本順天舉人萬盛
順天東安昌樂訓導周尚文武清柳芳玉田李茂無極
李暄開州任勉陳璋僉事侯英及弟侃副使甘澤贊皇

劉哲平山光祿署丞李傑莘縣李志及子忱邢臺井澍
豐潤馬敬柏鄉高明定州竇文真王達平鄉張翱史諫
史誼永平秦良朱輝武平衛成綱楊昇隆慶左衛衛瑾
宣府左衛何文玘潼關衛千戶藍瑄遼東定遼左衛劉
定東寧衛序班劉鼎江寧福建參議盧雍徐州吳友直
路車張棟山陽楊旻順孫王鉉滁州黃正長洲朱灝無
錫秦永孚仲孚合肥沈誼六安黃用賢沭陽支儉休寧
吳仲成懷寧吳本清沛縣蔡清歸德衛沈忠杭州右衛

金洪黃巖項茂富陽何訥浙江西安錦衣百戶鄭得麗
水葉伯廣海寧董謙浙江建德蔡廷璫奉化陸洪餘干
桃源訓導張憲永豐呂盛晉江史惠平溪汪浩江夏傅
實周璽監利劉祥湘陰邵敏東昌張銳莘縣孔昭趙全
恩縣王弘汶上張廊堂邑王歡陽穀錢道單縣徐洲聊
城王安孫良歷城湖廣布政使王允曹州黃表張倫臨
清劉端壽陽吳宗潞州張倫大同楊茂楊瑞焦鑑渾源
慶都縣丞王誠高平李振民平陽衛指揮僉事楊輔安

東中衛屯王經許州何清汜水張俊信陽王綱素洪汲
縣張琛封邱陳瑛光州太平通判劉進羅山王賓衛輝
徐寧邾縣劉濟西平尹冕新鄉王興碓山劉政長葛蒙
陰訓導羅貴陽武舉人蕭盛弘農衛習潤涇陽趙謚駱
森趙稭同州張鼎洋縣武全甘州左衛毛綱華陰周祿
保安李端合州陳伯剛臨桂劉本姚州土官高紫潼賜
弘治間則有大興錢福宛平序班夏琮青縣張俸南和
張彪曲周趙象賢長垣王鼎開州甘潤馬宗範薊州孟

振遷安韓廷玉元氏王懋深州王寧天津衛鄭海武平
衛王矩廣寧右衛李周霍邱徐汝楫海州定邊衛經歷
徐謐邳州丁友懷遠徐本忠劉澄宣城吳宗周潁上王
翊鳳陽衛張全鳳陽張欽王澄嘉定縣沈輔沈程崑山
徐協祥豐縣周潭徐州權字楊輔績侯許欽英山段弘
仁六安張時厚蕭縣唐鸞南傑錢塘朱昌仁和陳璋璋
妻錢氏餘姚黃濟之桐廬王瑁江西樂安謝紳南昌左
衛黃璉安福劉珍豐城余壽湖廣寧鄉同知劉端湘陰

甘準祁陽張機閬縣高惟一龍溪王彛濟南序班谷珍

莘縣白溥鄒平辛恕堂邑李尚質益都冀琮文登致仕

縣丞劉鑑臨清王祐寧海州卜懷陵川徐河徐瑛平遙

趙澄澤州宋甫裴春舉人李用興縣白好古解州李錦

陽曲薛敬榆次趙復性屯留衛李清儀封謝欽祥符陳

鎧周府儀賓史經西平張文佐河南唐縣李擴登封王

祺嵩縣杜端裕州劉宗周閬鄉薛璋洛陽護衛軍餘章

瀚鈞州陳希全新鄭張遂邳縣黃錦咸寧舉人楊時敷

涇陽熊玻張憲隴西李琦甘州後衛徐行博羅何宇新
雲南芮城李錦及子澤澤子柄太和楊謫仙靖安陳伯
瑄及子恩正德間則有高邑湘潭驛丞董玗藁城劉強
定州趙鵬吳橋段興直隸新城李瑟沙河王得時青陽
李希仁永康歸德訓導應剛進賢趙氏郡珍宜春易直
善化陳大用湘陰蘇純侯官黃文會邵武謝思長山許
嗣聰聊城梁瑾曲阜孔承夏日照張旻臨汾李大經及
子承芳新鄭王科浦城雷瑜嵩明陳大韶嘉靖以後國

史不詳載姓名所可考者嘉靖間則有直隸趙進黃流
張節冀州王國臣六安順孫李九疇望江順孫龍湧太
湖呂腆沛縣楊冕潁上王敷政華亭徐億浙江龔曇王
晁孫堪樓堦邱叙吳燧江西余冠雄曾柏福建吳毓嘉
孫炳邱子能莆田舉人方重杰山東宮守禮王選河南
馮金玉劉一胖信陽趙謨孝婦韓氏安氏杞縣邊雲鵠
陝西黃驥張琛李實環縣趙璋新會容瑞四川李應麒
嘉定州舉人王表祿豐唐文炳文蔚蒙化舉人范運吉

黃巖又有旌表天下孝子鮑燦陸文徐億等俱軼其鄉

里隆慶間則有大興李彪靜海周一念周斐遷安楊騰

松江舉人馮行可新鄉張登元興業何世錦崇善何理

萬厯間則有直隸韓錫深州林基井陘張民望清豐侯

燦河間吳應奎平山舉人邢雲衢邳州張鎮直隸華亭

楊應祈高承順太湖顧槐盱眙蔣廬六安何金遂安毛

存元江西余鎰徐信都昌曹珊萬安劉靜新建樊儆舒

泰會昌歐于復鄱陽李岐奉新周勛南昌曹必和湖廣

賈應進光化蔡佩蔡玉黃岡唐治浦城徐彪泉州訓導
王熺及熺子文昇晉江韋起宗山東馬致遠冠縣申一
琴一攀岳陽王應科河南侯鶴齡歸德賈洙密縣陳邦
寵舞陽楊愈光汜水王謙浙川劉待徵陝西劉燧涇陽
韓汝復寧州周大賢成都後衛楊茂勲井研曾海大姚
金鯉蒙化范潤四川孝女解氏又有馬錦張浩杜惠孝
女楊氏等不詳邑里天啓間則有安州邵桂棗強先自
正晉州張蘭高邑孫喬上海張秉介高淳葛至學旌德

江景宗山陽張致中歙縣吳榮讓孝童女胡之憲玉娥

慈谿馮象臨吉水郭元達宜春鍾名揚峽江黃國賓臨

川傅合萬載彭夢瑞南康楊可幸萬安羅應賚江西樂

安曹希和安福孝婦王三重妻謝氏孝感施文星福建

李躍龍甌寧陳榮晉江邱應賓浦城吳昂禹城給事中

楊士衡泰安范希賢曹縣王治寧曲阜孔弘傳德州紀

紹堯聞喜張學孔陳州郭一肖虞城呂桂芳浙川何大

縉華州孫繩祖梁山李資孝又有王錫光不詳邑里崇

禎間則有應天王之卿故城李華先仁和沈尚志江西王之範福建吳宗烜山東朱文龍忻州趙裕心稷山舉人史宗禹淳化高起鳳雲南趙文宿又有王宅中任萬庫武世捷孔維章浦某褚咸孫良輔等不詳邑里皆以孝行旌其門其同居敦睦者則有洪武時龍游夏文昭四世同居成化間霸州秦貴建德何永敬蒲圻李玘句容戴睿饒陽耿寬俱七世同居石首王宗義五世同爨宿遷張賓八世同爨安東蘇勒潞城韓錦李昇永州唐

汝賢豐城劉志清俱六世同居弘治間密雲李琚合肥
鄭元陵川徐梁安東朱勇五世同居慶都黃鍾定邈衛
韓鵬俱六世同居孝感程昂七世同居秦州王玉八世
同爨正德間山陽丁震五世同居嘉靖間石偉十一世
同居遂安毛彥恭六世同居萬歷間蕭梅七世同居滁
州盧守一長治仇大六世同居先後得節烈貞女二十
三人太平楊乙六累世同居天啓間南城吳煥八世同
居皆旌曰義門其輸財助官賑濟者則有正統間千戶

胡文郁訓術李曷訓科劉文勝吉安胡有初謝子寬浮

梁范孔孫榆次于敏邳州鞏得海岑仲暉高興葉旺高

宗泰沭陽葛禎清河王仲英山陽鮑越懷遠廖冠平張

簡石州張雷淮安梁辟李成俞勝徐成潞州李廷玉羅

山王必通溧陽陸旺餘干舒彥祥溫州李倫鄒有真四

安何仕能王清景泰間江陰陳安常天順間潮陽郭吾

太原栗仲仁代州李斌弘治中歸善吳宗益宗義及宗

義子璋隆慶間永寧王潔胥瓚萬厯間少卿吳炯浙江

董欽等臨清張氏江西胡士琇丁果妻世潔黎金球山西孫光勳高自修亳州李文明順義楊惟孝天啓間南城吳煥崇禎間席本楨等皆旌表門閭或賜匾書褒勞

孝義一

鄭濂王澄

徐允讓石永壽

錢瑛曾鼎

姚玘

邱鐸李茂

崔敏劉錡

周琬虞宗濟等

伍洪劉文煥

朱 煦 危真昉

劉 謹

李德成

沈德四

謝定住

包實夫
蘇奎章

權 謹

趙

紳

向化
陸尚質

趙 祥

鄭濂字仲德浦江人其家累世同居幾三百年七世祖

綺載宋史孝義傳六傳至文嗣旌為義門載元史孝友

傳弟文融字太和部使者余闕表為東浙第一家鄭氏

家法代以一人主政家文融卒嗣子欽繼之嘗刺血療

本生父疾欽卒弟鉅繼鉅卒弟銘當主家政以兄子渭
宗子也相讓久之始受事銘受業於吳萊銘卒弟鉉繼
父喪慟哭三日髮鬚盡白元末兵起大將數入其境相
戒無犯義門樞密判官阿爾輝軍奪民財鉉以利害折
之引去明兵臨婺州鉉挈家避右丞李文忠為扁鑰其
家而遣兵護之歸至正中卒渭繼渭卒弟濂繼濂受知
於太祖昆弟由是顯濂以賦長詣京師太祖問治家長
久之道對曰謹守祖訓不聽婦言帝稱善賜之果濂拜

賜懷歸剖分家人帝聞嘉歎欲官之以老辭時富室多以罪傾宗而鄭氏數千指獨完會胡惟庸以罪誅有訴鄭氏交通者吏捕之兄弟六人爭欲行濂弟湜竟往時濂在京師迎謂曰吾居長當認罪湜曰兄年老吾自往辨二人爭入獄太祖召見曰有人如此肯從人為逆耶宥之立擢湜為左叅議命舉所知湜舉同郡王應等五人皆授參議湜字仲持居官有政聲南靖民為亂誣誤者數百家湜言於諸將盡釋免居一歲入覲卒於京十

九年濂坐事當逮從弟洧曰吾家稱義門先世有兄代
弟死者吾可不代兄死乎詣吏自誣服斬於市洧字仲
宗受業於宋濂有學行鄉人哀之私謚貞義處士濂卒
弟洪繼二十六年東宮缺官命廷臣舉孝弟敦行者衆
以鄭氏對太祖曰其里王氏亦倣鄭氏家法乃徵兩家
子弟年三十上者悉赴京擢濂弟濟與王勲為春坊左
右庶子後又徵濂弟沂自白衣擢禮部尚書年餘致仕
永樂元年入朝留為故官未幾復謝去濂從子幹官御

史棠官檢討他得官者復數人鄭氏愈顯濟棠皆學於宋濂有文行初洪嘗仕元為浙江行省宣使主家政數年建文帝表其門洪朝謝御書孝義家三字賜之燕兵既入有告建文帝匿其家者遣人索之洪家廳事中列十大櫃五貯經史五貯兵器備不虞使者至所發皆經史寘其半不啓乃免於禍人以為至行所感云成化十年有司奏鄭永朝世敦行義復旌以孝義之門自文融至洪皆以篤行著文融著家範三卷凡五十八則子欽

增七十則從子鉉又增九十二則至濂弟濤與從弟泳
澳湜白于兄濂源共相損益定為一百六十八則刊行
焉王澄字德輝亦浦江人歲儉出粟貸人不取其息有
鬻產者必增直以足之慕義門鄭氏風將終集子孫誨
之曰汝曹能合食同居如鄭氏吾死瞑目矣子孫咸拜
受教澄生三子子覺子麟子偉克承父志子覺生應即
為鄭湜所舉擢參議者子偉生懃即與鄭濟並擢庶子
者義門王氏之名遂埒鄭氏又有王燾者蘄水人七世

同居一家二百餘口人無間言洪武九年十一月詔旌為孝義之門

徐允讓浙江山陰人元末賊起奉父安走避山谷間遇賊欲斫安頸允讓大呼曰寧殺我勿殺我父賊遂舍安殺允讓將辱其妻潘氏紹曰吾夫已死從汝必矣若能焚吾夫則無憾也賊許之潘聚薪焚夫投烈焰中死賊驚歎去安獲全洪武十六年夫婦並旌同時石永壽者新昌人負老父避賊賊執其父將殺之號泣請代賊殺

永壽而去

錢瑛字可大吉水人生八月而孤年十三能應秋試及長值元季亂奉祖本和及母避難歷五六年遇賊縛本和瑛奔救并縛之本和哀告貰其孫瑛泣請代不已賊憐而兩釋之時瑛母亦被執瑛妻張從伏莽中窺見即趨出謂賊曰姑老矣請縛我賊從之既就縛擲袖中鞵與姑訣曰婦無用此矣且行且睨姑稍遠即罵賊不肯行賊持之急罵益厲賊怒攢刃刺殺之事定有司知瑛

賢凡三薦并以親老辭子遂志成進士官山東僉事同時曾鼎字元友泰和人祖懷可父思立並有學行元末鼎奉母避賊母被執鼎跪而泣請代賊怒將殺母鼎號呼以身翼蔽傷頂肩及足控母不舍賊魁繼至憫之攜其母子入營療治獲愈行省聞其賢辟為濂溪書院山長洪武八年知縣郝思讓辟教設學鼎好學能詩兼工八分及邵子數學

姚玘松江人元至正中苗帥楊完者兵入境玘奉母避

於野阻河不得渡母泣曰兵至吾誓不受辱遂沉於水
玘急投水救之負母而出已數遇盜中矢玘佯死伏屍
間以免乃奉母過湖淮後母病思食魚暮夜無從得家
養一鳥忽飛去攫魚以歸洪武初行省聞其賢辟之以
親老不就

邱鐸字文振祥符人元末父誠為湖廣儒學提舉值兵
亂鐸奉親播遷賣藥供甘旨母卒哀慟幾絕葬鳴鳳山
結廬墓側朝夕上食如生時當寒夜月黑悲風蕭瑟鐸

輒繞墓號曰兒在斯兒在斯山深多虎聞鐸哭聲避去
時稱真孝子鐸初避寇慶元從祖父母居故鄉者八人
貧不能自存鐸悉迎養之有姑年十八夫亡守節鐸養
之終身後有李茂者澄城諸生也母患惡瘡茂日吮膿
血夜則叩天祈代及卒結廬墓旁朝夕悲泣天大雨懼
衝其墓伏墓而哭雨止乃已父卒廬墓如之成化二年
旌二子表森森為國子生茂卒兄弟同廬於墓弘治五
年旌表子俊亦國子生表卒俊方弱冠廬墓終喪母卒

亦如初正德四年旌

崔敏字好學襄陽人生四十日其父仕元為綿竹尹父
子隔絕者三十年敏依母兄以居元季寇亂母及兄俱
相失亂定入陝尋母不得由陝入川抵綿竹求父塚無
知者復還陝訪諸親故始知父殯所在乃啓攢負骸歸
時稱崔孝子同時劉鎬江西龍泉人父允中洪武五年
舉人官憑祥巡檢卒於任鎬以道遠家貧不能返柩居
常悲泣父友憐之言於廣西監司聘為臨桂訓導尋假

公事赴憑祥莫知塋處鎬晝夜環呼一蒼頭故從其父
已轉入交趾忽暮至若有憑之者因得塚所在刺血驗
之良是乃負歸塋有顧琇者字季粟吳縣人洪武初父
充鳳翔軍母隨行留琇守邱墓越六年母歿琇奔赴負
母骨行數千里寢則懸之屋梁涉則戴之於頂父釋歸
卒水漿不入口五日不勝喪而死

周琬江寧人洪武時父為滁州牧坐罪論死琬年十六
叩閭請代帝疑受人教命斬之琬顏色不變帝異之命

宥父死謫戍邊琬復請曰戍與斬均死爾父死子安用
生為願就死以贖父戍帝復怒命縛赴市曹琬色甚喜
帝察其誠即釋之親題御屏曰孝子周琬尋授兵科給
事中同時子代父死者更有虞宗濟胡剛陳圭宗濟字
思訓常熟人父兄並有罪吏將逮治宗濟謂兄曰事涉
徭役國法嚴往必死父老矣兄冢嗣且未有後我幸產
兒可代死乃挺身詣吏白父兄無所預吏疑而訊之悉
自引伏洪武四年竟斬於市年二十二剛江浙新昌人

洪武初父謫役泗上以逃亡當死敕駙馬都尉梅殷監
刑剛時方走省立河上俟渡聞之即解衣泅水而往哀
號泣代殷憫之奏聞詔宥其父并宥同罪者八十二人
圭黃巖人父為讐人所訐當死圭詣闕上章曰臣為子
不能諫父致陷不義罪當死乞原父使自新帝大喜曰
不謂今日有此孝子宜赦其父俟四方朝覲官至播告
之以風勵天下刑部尚書開濟奏曰罪有常刑不宜屈
法開僥倖路乃聽圭代而戍其父雲南十七年左都御

史詹徽奏言太平府民有毆孕婦至死者罪當絞其子請代章下大理卿鄒俊議曰子代父死情固可嘉然死婦繫二人之命寬曷由申犯人當二死之條律何可貸與其存犯法之父孰若全無罪之兒詔從其議

伍洪字伯宏安福人洪武四年進士授績溪主簿擢上元知縣丁外艱服闋以母老不復仕推資產與諸弟而已獨隱居養母有異母弟得罪逃使者捕弗獲執其母洪哭訴求代母曰汝往必死莫若吾自當之洪曰安有

子在而累母者遂行竟死於市時有劉文煥者廣濟人與兄文輝運糧愆期當死兄以長坐文煥詣吏請代叩頭流血所司上其狀命宥之則兄已死矣太祖特書義民二字獎之時京師有兄坐法兩弟各自縛請代太祖遣使問故同詞對曰臣少失父非兄無以至今日兄當死弟安敢愛其生帝陽許之而戒行刑者曰有難色者殺之否則奏聞兩人皆引頸就刃帝大嗟異欲并其兄貫之左都御史詹徽持不可卒殺其兄

朱煦仙居人父季用為福州知府洪武十八年詔盡逮天下積歲官吏為民害者赴京師築城季用居官僅五月亦被逮病不能堪謂煦曰吾辦一死耳汝第收吾骨歸葬煦惶惧不敢頃刻離時訴枉令嚴訴而戍極邊者三人抵極刑者四人矣煦奮然曰訴不訴等死耳設父緣訴獲免即就戮無恨即具狀叩閭太祖憫其誠赦季用復其官有危貞昉者字孟陽臨海諸生父孝先洪武四年進士官陵川縣丞坐法輸作江浦貞昉詣闕上疏

曰臣父絳吏議輸作筋力向衰不任勞苦而大母年踰九十恐染霜露之病貽臣父終天之恨臣犬馬齒方壯願代父作勞俾父獲歸養死且不朽詔從之貞昉力作不勝勞閱七月病卒

劉謹浙江山陰人洪武中父坐法戍雲南謹方六歲問家人雲南何在家人以西南指之輒朝夕向之拜年十四矍然曰雲南雖萬里天下豈有無父之子哉奮身而往閱四月抵其地遇父於逆旅相持號慟俄父患瘋痺

謹告官乞以身代法令戍邊者必年十六以上嫡長男
始許代時謹未成丁伯兄先死乃歸家携兄子往兄子
亦弱未能自立復歸悉鬻其產畀兄子始獲奉其父還
孝養終身

李德成涑水人幼喪父元末年十二隨母避寇至河濱
寇騎迫母投河死德成長娶婦王氏搏土為父母像與
妻朝夕事之方嚴冬大雪冰堅至河底德成夢母曰我
處冰下寒不得出覺而大慟且與妻徒跣行三百里抵

河濱臥冰七日水果融數十丈恍惚若見其母而他處
堅凍如故久之乃歸洪武十九年舉孝廉屢擢尚寶丞
二十七年旌為孝子建文中燕兵逼濟南德成往諭令
還兵燕兵不退德成歸以辱命下吏已而釋之永樂初
復官屢遷陝西布政使

沈德四松江華亭人祖母疾刲股療之愈已而祖父疾
又刲肝作湯進之亦愈洪武二十六年被旌尋授太常
贊禮郎上元姚金玉昌平王德兒亦以刲肝愈母疾與

德四同旌至二十七年九月山東守臣言日照民江伯
兒母疾割脇肉以療不愈禱岱嶽神母疾瘳願殺子以
祀已果瘳竟殺其三歲兒帝大怒曰父子天倫至重禮
父服長子三年今小民無知滅倫害理亟宜治罪遂逮
伯兒杖之百遣戍海南因命議旌表例禮臣議曰人子
事親居則致其敬養則致其樂有疾則醫藥籲禱迫切
之情人子所得為也至臨冰割股上古未聞倘父母止
有一子或割肝而喪生或臥冰而致死使父母無依宗

祀永絕反為不孝之大皆由愚昧之徒尚詭異駭愚俗
希旌表規避里徭割股不已至於割肝割肝不已至于
殺子違道傷生莫此為甚自今父母有疾療治罔効不
得已而臥冰割股亦聽其所為不在旌表例制曰可永
樂間江陰衛卒徐佛保等復以割股被旌而掖縣張信
金吾右衛總旂張法保授李德成故事俱擢尚寶丞迨
英景以還即割股者亦格於律不以聞而所旌大率皆
廬墓者矣

謝定住大同廣昌人年十二家失牛母抱幼子追逐定住隨母後虎躍出噬其母定住奮前擊之虎逸去取弟抱之扶母行虎復追齧母頸定住再擊之虎復去行數武虎還齧母足定住復取石擊虎乃舍去母子三人並全永樂十二年帝召見嘉獎賜米十石鈔二百錠旌其門先是洪武中有包實夫者進賢人授徒數十里外途過虎銜衣入林中釋而蹲實夫拜請曰吾被食命也如父母失養何虎即舍去後人名其地為拜虎岡其後嘉

靖中筠連諸生蘇奎章從父入山猝遇虎奎章倉皇泣告願舍父食已虎曳尾徐去後為岷府教授

權謹字仲常徐州人十歲喪父即哀毀奉母至孝永樂四年薦授樂安知縣遷光祿署丞以省侍歸母年九十終廬墓三年致泉湧兔馴之異有司以聞仁宗命馳驛赴闕出具事狀令侍臣朗誦大廷以示百僚即拜文華殿大學士謹辭帝曰朕擢卿以風天下為子者他非卿責也尋扈從皇太子監國南京宣宗嗣位以疾乞歸改

通政司右參議賜白金文綺致仕子倫舉永樂中鄉試
養親二十年親終不仕倫子字父母卒皆廬墓成化十
二年亦獲旌

趙紳字以行諸暨人父秩永樂中為高郵州學正考滿
赴京至武城縣墮水紳奮身下救河流湍悍俱不能出
明日尸浮水上紳兩手抱父臂不釋宣德五年旌其門
有向化者靜海衛人父上為衛指揮墮海死化號泣求
屍不得亦投于海忽父屍浮出衣盡脫天方晴霽忽雷

雨驟作既息化首頂父衣浮出一處衆異而收葬之陸尚質者浙江山陰人父渡江遇風將入海尚質自崖上見之旋即躍入濤中欲挽舟近岸父舟獲濟而尚質竟溺死里人呼其處為陸郎渡

趙祥字景德永平人永樂中父亮為金山衛百戶祥年十四被倭掠國王知為中國人召侍左右改名元貴遂仕其國有妻子然心未嘗一日忘中國也屢諷王入貢宣德中與使臣偕來上疏言臣夙遭俘掠抱讐痛心流

離困苦艱辛萬狀今獲生還中國夫豈由人伏乞賜歸
侍養不勝至願天子方懷柔遠人不從其請但許給驛
暫歸仍還本國祥抵家獨其母在不能識曰果吾兒則
耳陰有赤痣驗之信抱持痛哭未幾別去至日本啓以
帝意國王允之仍令入貢祥乃復申前請詔許襲職歸
養母子相失二十年又有中外之限竟得遂其初志聞
者異之

明史卷二百九十六

欽定四庫全書

明史卷二百九十六考證

孝義百官聞父母喪不待報得去官

臣方煒按洪武

二十四年七月龍江衛吏以過罰書寫值母喪乞守制吏部尚書詹徽不聽吏擊登聞鼓以訴帝召徽切責而許吏終喪見明實錄謹附識

鄭濂傳濂弟濟與王懃為春坊左右庶子

臣方煒按

濂從兄淵有孝行母卒積哀身為之贖中外交薦以

病辭卒宋濂表其墓曰貞孝見識大錄謹附識

鄭濂傳濂從子幹官御史掌官檢討他得官者復數人

臣方煒按明實錄永樂十四年陞蜀府教授鄭梢為本府左長史致仕楷浦江義門從蜀王椿之請也
謹附識

周琬傳 陳圭附 乃聽圭代而戍其父雲南 臣方煒按

洪武二十五年正月天策衛卒吳英父得罪繫獄英詣闕願沒為官奴以贖父罪特允之見明實錄謹附

識

李德成傳洪武十九年舉孝廉屢擢尚寶丞

臣方煒

按德成舉孝廉授光祿署丞改太常贊禮郎二十五年擢尚寶司丞見識大錄謹附識

明史卷二百九十六考證



財團
 法人
 佛陀教育基金會
 釋淨空
 敬贈



總校官編修
 吳紹潔